

positionis quintæ huius motus fixorum siderum ab Alfonsi regis æra vsq; ad annos domini 1514. perfectos, cōpleuit in centum annis gradum vnum & minuta prima x. fere. Igitur idem motus ab æra Alfonsi vsq; ad eosdem annos dominicæ incarnationis 1514. perfectos velocior fuerat quā quadringentis annis ante Ptolemæi considerationem, quod potissimū existit iudicium, caput cancri eclipticæ nonæ sphaeræ ab Alfonsi æra vsq; ad annos domini 1514. completos delatum fuisse iuxta signiferi successionem, atq; per superiorem seu septentrionalem parui sui circuli medietatem. At q̄ idem caput cancri eclipticæ nonæ sphaeræ ab Alfonsi æra vsq; ad annos domini 1514. completos versatum sit in secundo quadrante & non in primo parui sui circuli, aut potius iuxta sectionē orientalem eiusdem circuli parui & eclipticæ decimæ sphaeræ, liquet ex eo, quoniā motus stellarum non errantiū, ab Alfonso vsq; ad annos domini 1514. completos inuenitur fuisse tardior, quā a Ptolemæi æra vsq; ad Alfonsi æram. Necesse igitur est per primū corolariū propositionis septimæ huius circa annos domini 1514. perfectos, caput idem cancri alteri duarū sectionū eclipticæ decimæ sphaeræ propinquius extitisse quā circa Alfonsi regis ærā. Nā si per impossibile, eiusdem caput cancri eclipticæ nonæ sphaeræ subiecerimus, tum Alfonsi tempore cum æuo nostro id est circa annos domini 1514. perfectos in primo quadrante parui circuli, caput igitur eiusdem cancri nostra ætate propinquius accedet eiusdem parui circuli summitati, quā Alfonsi tempore quia ætas nostra Alfonsi tempore longe posterior existit, ergo per primū corolariū propositionis septimæ huius motus stellarum non erraticarū ab Alfonso vsq; ad annos domini 1514. completos velocior fuisset quā ante Alfonsi ærā, quod est impossibile atq; contrariū experientiae & his quæ ostensa fuerunt in demonstratione quintæ propositionis huius. Igitur versatio capitis cancri eclipticæ nonæ sphaeræ ab Alfonsi regis æra vsq; ad annos domini 1514. perfectos facta fuit in secundo sui parui circuli quadrante, aut iuxta sectionem parui circuli & eclipticæ decimæ sphaeræ orientālē, quod hæten⁹ decebat demonstrare.